

劉襄勤公奏稿

劉襄勤公（毅齋）奏稿

劉錦棠著

劉公

襄奏

勤稿

劉襄勤公奏稿卷二

起光緒六年四月
訖光緒七年八月

目錄

遵 旨密陳新疆西路邊防情形摺

前赴哈密籌商邊防善後事宜暨起程日期摺

布置南路暨哈密等處防務摺

增設行營糧臺並遴員督辦臺務片

遵 旨統轄哈密及鎮迪道屬文武辦理緣由摺

請免余虎恩騎射片

奏籌邊重寄才力難勝再陳下悃摺

請 旌烈婦劉李氏摺

首逆逋誅請 飭使臣向俄理論解送懲辦摺

新疆命盜案件請暫行變通辦理摺

請 飭河南照額協解嵩武軍餉片

新疆南路五次剿平邊寇摺

籲懇 節哀摺

請 卹蕭迎祥摺

請 旌烈婦蕭賀氏片

烏魯木齊提標營制未復請 飭部緩催造冊摺

提標及各路副參游都關防遺失請 飭部補鑄片

新疆南路西四城興修各工完竣並籌辦應修各工

摺

湘軍文武員弁積勞病故請 卹摺

請 卹丁翰片

接收伊犁及分界事宜現籌辦理情形摺
科布多所屬布倫托海無庸撥營駐紮片

回子郡王之子承襲世爵摺

回部坎巨提呈進 貢沙金片

擒獲安夷監禁已久分別辦理摺

遵 旨密陳新疆西路邊防情形摺

光緒六年四月初二日

奏爲遵

旨密陳新疆西路各城邊防情形一摺仰祈

聖鑒事竊

臣

於三月十三日承准軍機大臣密寄正月二

十一日奉

上諭本日據王大臣等會議籌備邊防事宜一摺此次俄國與崇厚所議條約章程多所要求斷難允准已改派曾紀澤前往再議惟該國不遂所欲恐其伺隙啟衅必須有備無患以折狡謀新疆防務緊要左宗棠熟悉邊情老於軍事卽著將南北兩路邊防通盤籌畫務臻周密本日有

旨令劉錦棠幫辦新疆軍務劉錦棠金順兩軍均在前敵尤爲喫重並著隨時偵探防範會商左宗棠妥爲布置錫綸現駐塔城兵力太單且與俄人偪處宜策萬全如能就地選募邊人招徠蕃屬亦可壯我聲威著與左宗棠商酌辦理棍噶札拉參久在邊疆聞爲俄人所憚該呼圖克圖前經給假三年現當用人之際著錫綸傳旨令其銷假赴營統帶所部以爲犄角錫綸駕馭有方當可收指臂之助左宗棠前有移營哈密之奏究竟移紮該處能否聯絡聲勢有裨前敵是否於後路不致懸隔可以兼顧該督當斟酌情形妥籌進止至練生軍以防師老足糧食以計久長

聯兵勢以完後路均係目前要著並著悉心經畫以固疆
圍現在時勢艱難全賴該督等爲國宣勤同仇敵愾所有
一切機宜著於奉旨一月內迅速具奏以慰廑系將此由
五百里各密諭知之欽此竊惟俄國前乘回變攘竊伊犁
迫官軍廓清天山南北又復藪我逋逃不行縛送血氣之
倫固已同深憤懣此次因退還伊犁多所要挾界務商務
各條枝節橫生居心尤爲險譎現在曾紀澤銜

命往俄再與辯議該國知前約決難允准或者稍抑狡謀
俯首以從亦未可定惟戎心叵測凡在邊疆將士自應先
事預防以期有備無患若果兵衅一開則天山南北兩路

均關緊要自非合力圖之不可臣承准督辦新疆軍務大學士陝甘督臣左宗棠咨送二月二十三日拜發摺稿以精河一帶堅扼要隘之任責之伊犁將軍金順以塔爾巴哈臺防務責之參贊大臣錫綸而派廣東陸路提督張曜率師由阿克蘇亦嶺逕趨伊犁派臣分兵取道烏什西繞布魯特遊牧地亦指伊犁以斷俄人圖援伊犁之路如此路上進則屯兵喀什噶爾外卡遙張采入俄境之勢使知內患堪虞時勤狼顧不敢復爲稀突老成至計固已無微弗喻臣查烏什繞赴伊犁從前本有換防官兵往來捷徑果能由此直擣大城則避實擊虛出奇制勝洵爲兵家上

策惟該處布魯特向屬回地是以官兵往來如行衽席之上自同治年間回疆不靖該布魯特卽爲俄人誘往服屬現在烏什北行二百餘里出拜代里達坂卽係俄境今昔情形倏然迥異烏什地勢偏北由喀什噶爾前往該城已十餘站與臣現駐之回疆西路四城相距寫遠難於兼顧此烏什之西未便進兵之實在情形也回疆幅員廣莫纏回土回布魯特族種繁多民志未定控制安撫本未易言而喀什噶爾英吉沙爾葉爾羌和闐四城尤有甚難者按阿克蘇拜城一帶與伊犁相值以地勢考之西路四城斗出伊犁幾二千里沿邊卡倫與俄國圖爾齊斯坦總督所

駐之塔什罕七河巡撫所駐之阿里木臺均不甚遠而納林橋托和瑪克窩什阿來等俄城在在緊鄰伏讀

諭旨尤爲喫重等因仰見

聖明洞燭無遺下懷莫名欽服

臣

自肅清新疆逐日訓練

士馬如臨大敵而四年之九月十月五年之正月八月陝回安集延布魯特等逆四次犯邊幸仗

天威隨時撲滅其爲不可一日弛備已可概見再查喀什噶爾由伊里斯克小路出卡至俄地之亦特木梭計程一千二百餘里與烏什往伊犁之路相會較烏什前去約多七百餘里而可省繞走烏什之十餘站似進兵稍爲便利

然由喀什噶爾啟行三百四十里至鐵勒克達坂下亦卽
俄屬布魯特各部若以孤軍深入不特運道必有疏虞卽
軍行亦難暢達臣現部馬步萬人防守瑪喇爾巴什以至
和闐各城綿長三千里差敷分布如分隊涉歷俄境遠圖
進取就現在兵力實屬有所未逮且所部將士久從征役
疲病頗多上年咨商陝甘督臣左宗棠派隊出關以資換
補已經左宗棠

奏明調派題奏提督陝西漢中鎮總兵譚上連記名提督
甯夏鎮總兵譚拔萃等統率前來雖餉項奇絀軍數未能
多增而挑補生軍裁汰疲弱仍可足成萬人原額擬俟陸

續到齊加以整頓可期士氣常新將來天山北路一有舉動或須抽撥隊伍分屯喀什噶爾外卡以張深入俄境之勢自應遵照左宗棠原

奏妥慎辦理至偵探敵情本屬要務惟彼族稽查嚴密必使夷類前往方不致滋生事端

臣

於四年夏間商明左宗

棠招募有身家之布魯特兩哨充當馬隊並令該管頭目出具切實保結俾其輪班扮作商民往俄偵探較易得實遇有俄國確實舉動仍隨時咨報左宗棠以便代爲馳

奏仰慰

宸廑所有一切機宜

臣

才識短淺何敢率陳緣欽奉

諭旨於一月內迅速具奏謹將西路四城防務情形撮舉大概恭摺密陳伏乞

皇太后

皇上聖鑒訓示施行謹

奏

軍機大臣奉

旨另有旨欽此

軍機大臣字寄光緒六年五月十三日奉

上諭劉錦棠奏覆陳新疆西路各城邊防情形一摺所陳
進兵道路及偵探敵情各節尙爲詳悉該京卿所部現在
防守瑪喇爾巴什以至和闐各城地段遼闊務當就現有
兵力嚴密布置以期有備無患喀什噶爾等城邊境多與
俄境毗連尤宜不動聲色勤加偵探隨時咨商左宗棠相
機防範毋稍疏虞將此由五百里諭令知之欽此

前赴哈密籌商邊防善後事宜暨起程日期摺

八月二十一日

奏爲

微臣

前赴哈密籌商邊防善後各事宜暨由喀什噶

爾啟程日期恭摺陳明仰祈

聖鑒事竊維新疆西四城地方毗連夷境道路綿長邊防

事宜較他處尤爲喫重

臣

以菲材駐防要地兼之善後諸

務頭緒繁多恆恐勿克勝任致有貽誤因擬輕騎減從親

赴哈密與督辦新疆軍務大學士陝甘督

臣

左宗棠面商

一切機宜八月十四日接閱左宗棠來函亦有沿邊防務

如已周密應卽赴哈一行以便詳細熟籌等語自當遵照

辦理查俄國前有兵屯紮喀屬界外嗣據探報業已悉數